



西山爽氣集上

虞山蔣廷錫酉君

家園消夏八首

蒹畦種蠶苧小圃栽蘿蒿
蒿長苧莢大摘採寧辭
勞驅愁似避瘡尋樂如
追逃緬懷一畝宮猶是
先人膏一時功名意于
我吹鴻毛清晨石上立
爽氣西山高

其二

會意不在遠偶吟興自適
松花綴黃玉香氣發蒸
粟落粉如飯煮不向道人
乞靜觀草木趣閒得魚
鳥逸看月有隙地琴彈有
壞室世事比獅子解弄

得六出來日苦尚多得失那可必

其三

閒行西山麓殘陽沒牛背山石亂犖确微逕訪陸

又讀艾謂五經欣有對碩人幸參會時于畏之玄對新義

汲廢井玄言破累魄斐然君子文弼中而彪外瑟

瑟王塵風披靡草蔚薈相別復廿日斯景猶好在

畏之往郡湘靈先生亦去鄉下相期秋風來吳江煮鱸膾

其四

舊年栽新竹今年竹無數綠閉北窓紗空庭聽鳥

語南軒傍水開擎荷盡軒舉跳魚躍水珠荷葉瀉

幾縷一陣葉戰風交加互撐拄池邊看水痕已減

昨日雨昨日誰家池掘藕盈筐宮粉股濯清泉玉
段埋泥土安得大如船仙人不我許

其五

草長塞三徑芟拔為鉏荒獨留蜀葵花紅白遙相

望綠蘿深窈窕高松倚青蒼雖無向日心而得枝

葉昌庭前堆亂石橫卧如羣羊還疑身入羣對石

兩相忘

其六

茅屋架三間器皿不礮斲蓬頭兩奴子執事亦端

慤磨墨請我書落筆重墮電臂強指節酸性鈍不

能學風雲變三朶筆勢搖五岳秦碑辨難認點畫

奇駁犖回頭顧奴子自覺其形渥不看千里駒三日見頭角

其七

出戶如出境到家如到邨風來荳棚下月上西南垣自從居此舍已見桐生孫深慙宅相兆終汙通德門余所居外王父本芝公舊宅也緬懷五舅氏二歿惟三存滄桑世變易未免嗟壺飧壺飧亦幾何有恨不得論我身幸不死我将告我昆

其八

惘惘出門去歸家已一年家人不我諂留我沽酒錢蘇生雖不遇猶有負郭田窮達一由命何事悲

青羶麩中論清濁杯底分聖賢富貴會有時食客當三千

夜宿虎丘與畏之子逸話及去年相別悵然有作

麻衣空深一年塵閒向蓬牕認故身歲月較前遲

七日

去年五月十七日虎丘相別今五月廿四日復聚于此

風光今夜只三人

去年畏之子逸星來

舜年今夕惟畏之子逸與余耳聲名贏得鬚眉舊詩句還誇囊篋新唯有曾中惆悵事歸家已過牡丹春

再用前韻寄星來舜年

柳色空濛漾細塵舊山山下似前身不須把酒邀三友只覺論詩少二人茉莉架邊香粉重石榴枝

上錦窠新聊憑八句傳佳景休認漁郎浪報春

絕
雨後至破山寺訪雪鑑和尚不值口占四

淙淙一夜除煩熱草履紗巾稱早晴五里青山三里郭籃輿肩得好風行

其二

科頭赤足脫蕉衫仰面看山日半銜鐘鼓初停午
齋罷碧幢雲影落松杉

其三

偶因乞食下禪牀自在何須在道場兩度山中避
暑客凭闌空望暢師房

其四

暮雲如絮復如衣閒趁斜陽步翠微最是卧龍橋
下水鐘鳴鼓擊待師歸

江葭涓遷居詩和湘靈韻

那將食宿定東西大磨光陰任取携家具
有書堪教子身謀留舌足驕妻青山入戶窓
檣曉綠樹依墻屋角齊舊宅新居相傍任暮鶯
還為兩邊啼

暇日試茶三用春字韻寄畏之

竹龍火焙絕無塵伴我東坡病瘦身味淡香幽比
君子骨清肉膩似佳人東坡詩從來佳茗似佳人松風蕭瑟浮烟靜
花片輕圓潑乳新洒掃玉川明月徑待君吹破武

林春

答畏之和虎丘詩四用前韻

春字詩來消渴塵一時圭璧爛彰身偶吟君作逢
場客再和予真好事人百里郵筒勞往復十年廢
水發清新紛紜經學知誰是投地皈依井大春

于五經無
所不貫

讀漢書

刻刀弄筆紛紛在成事何曾仗五車莫認留侯扶
帝業全憑圯上一編書

其二

省囊羞澁君休笑從古英雄足死生奇計苦無金

四萬難教亞夫葵彭城

倦極

白汗翻漿人倦極一輪炎日燒當空那能長向華
胥國兩腋橫生萬里風

題人避暑小照

鳳鼎細燒雲篆白龍團初試小茶紅胸中自有清
涼國不要芭蕉扇子風

鬪茶

綠暗蘄門雨筐籬摘葉柔全憑茶博士差遣酪蒼
頭文火輕如篆長泉活似油紅砂新水硃去聲白定
小磁甌蟾背翻旋沫魚珠躍亂漚松風雲影散花

氣雪光浮陽羨春還嫩鴉山色更優一旗開雨腋
三碗潤枯喉洗器香猶在看痕水未收建安鬪茶以水
痕先沒者為負
久者為勝性清元易汗種別各相讐隨口分高下從人道
好否每因烹汲惡常為葉嘉羞

談棋

各出爭先手饒渠一着差只緣爭勝負遂今競紛
拏結陣開雙角排門列五花斜飛落寒雁直點起
金鴉雄甚投林虎長于入穴蛇鷹疑逃狡兔月怕
啖蝦蟇以上六句皆角勢也勢作分溝意心存望蜀賒保家惟補
隙得計是攻瑕密布編魚麗相依足輔車開場當
一面覆局感三义黑白茫如海輪贏僅比蝸紫綃

龍女髮橘裡謔矜誇

浮瓜

本是朱陵實擔從方丈靈邵平為老圃張果作園
丁蒂落緹拋綠畦荒甕覆青捧來驚海日送到獲
江萍長索舒銀轆織絺幕井瓶清泉沉半面河氣
隱三星匏瓜三星
隱沒河內紅日窺周戶煩蒸逼曲榼雕盤風颯
冽碧碗水淋冷削片防傷指分刀怕斬伶剖開文
爛熳嚼破玉瓏玲熱以寒漿減神因子戰醒幾時
呂相第重築饘瓜亭

抱冰

汲得陵臺水寒生六月天肌清骨更瘦面淨腹彌

堅凜凜空高座冲冲憶去年冷嫌瑪瑙熱白鬪水
晶鮮圓潤無椎鑿規稜露折旋一壺月下魄三尺
鏡中緣眩目消紅淚凝光動碧連蠅痴驚凍雨狐
怯屢聽泉仕女輕含碎兒童巧鏤穿金盆盛玉塊
越井結寒筵似斗那能久如山豈得全亦知同幻
泡且自抱冰眠

科頭

愛說科頭樂無過三伏中任他涼灌頂不惜首飛
蓬柳下懸笊箸桐間戲感融寧同高士傲分得大
王雄無帽蓬頭子除巾秃髮翁盤粧學小女了髻
作邨童散坐斜陽外閑行宿露叢最先知冷氣常

是領松風人盡誇頭角予生感樊籠水邊驚種種
鏡裏看鬢髮白日三年夢烏紗半兩銅摩挲休嘆
息世事等頭空

濯足

不盡長流水消除兩足塵細看塵土厚知是遠歸
人兩歲悲吟越前年論過秦垂楊新灞岸杜宇古
天津空作看花客羞充觀國賓東華明月露南市
海棠春陌上追尋慣街頭來往頻炎風避皂蓋花
氣逐朱輪衝席驅岑寂閒吟破欠伸重衣度三夏
一浴隔經旬舊夢隨雲浦今愁問水濱還將濯足
意洗拔汙泥身

洗桐

小院深沉夏高梧結乳寒額波紅雁齒卍字曲闌
千葉上微風靜枝頭舊雨乾未容枯作炭只恐灼
成癩水母飛雲確明珠瀉玉盤天紳瀑布挂泉脉
輓轡蟠綠澹蕉心出霜濃竹粉團一條青玉案幾
束碧琅玕斗覺窓紗暗平添春水湯夕陽紅有影
嵐氣翠無端本自清新體從人磨刮看養成千尺
榦絕頂穩棲鸞

種蕉

移取蘇臺種栽來小院中嫩心初展結捲葉半舒
筒漸覺流雲綠俄遮烈日紅庭陰青帳幕墻面碧

紗籠眉黛爭看翠衣油暖欲烘粉光分汗簡秋氣
入簾櫳窓暗先愁雨天涼自戰風動時還嫵媚破
處見玲瓏杜若相依托芳蘭苦閉蒙酒當斟處淺

蕉葉飲觴
之最小者

鹿感夢時空露結垂甘子

蕉花中常有甘露，乾
則結子矣嶺南人呼爲

甘子書成代楮公謬勞彈事急長養是天工

碧筩

賓佐初開宴荷花拂水渦歌盃承露重圓扇受風
多半折摧青玉連根拔濁波花依新翠罩藕斷舊
絲窠珀盞澆瓊液銀針刺小科暗通流伏水旋出
巧盤螺細滴遲殘雨橫衝速擲梭未容喉尚轉空
得口如訛酒盡頭能俯傳來坐要踈捧持嫌醉客

斟酌倦嬌娥大白飛擎蓋空觴卧倒戈清香沁肺
腑不飲欲如何

廿四日玄對齋看荷畏之留郡未歸戲簡
二首仍用前春字韻

萍散風吹鏡破塵荷花朶朶見分身苦心開處邀
君賞着意看來是別人水國煙鄉三夏盡繩床烏
几一篇新太湖總有花多少要問湖邊羅綺春

其二

拂壁尋詩感暗塵與花都是隔年身座中醒客皆
狂客水面佳人即主人焚艾彥倫騰笑舊愛蓮茂
叔避花新如何不種蓬池種一瓣開時便一春

重題雙頭牡丹四絕

和恨和愁艷作堆根株相抱背相偎一宮姊妹渾
閒事各面東西喚不回

其二

枉費羅虬百首詩人間頓有兩紅兒問渠更有誰
堪比臨水分身照鏡時

其三

各夢同牀兩不知賞花人到已猜疑請思花並花
心意次第春風豈有私

其四

十載功夫用意栽一盃清酒酬花臺雙頭不是稀

奇事要祝明年三朶開

題殘荷

風風雨雨荻花叢乾葉聲中幾朶紅常笑春風太
輕薄到頭方恨悞秋風

其二

小水何從匹練光秋霜一夜落紅粧等閒易卷天
機段嫌煞滿池荷葉黃

天未明

星稀月出天未明室中蚊市歌朝轟呼僮點起松
明火火光燭戶蒼蠅驚蚊兒拂面蠅觸紙一時噉
譟無數聲竹牀颯颯颺鼠過空庭拍拍蝠燕爭咻

啣叫嘯老鴉語籬邊斷續蟀蟋鳴此聲聒耳皆惡
境使我卧立心怦怦急撲滅火倒頭睡白日上腹
松風清

詠史

天子無愁可奈何隋家唾手得山河任他打破東
平苑玉樹須終一曲歌

其二

一樣英雄計略同此何成事彼無功傷心三月咸
陽火不及迷樓一燼風

小遊仙十六首

曲頭車馬曜風光贈別裙衫織兩當莫怪兒郎踈

漏性被人猜破一身香

其二

蕪菁葉下捉流杯
桃子羣持賀壻來
十世飄零矇矓過
却因啼鳥苦思回

其三

玄寇雀瑩珮珊珊已得三年共往還
天上事多渾不記問郎仙品定何班

其四

一陣香風送有因
空看玉樹五株春
當時不是方平至
未必驅除此俗人

其五

玉卮娘子本無情
何事花間屢送迎
羅谷回頭千萬轉
始知薄命是書生

其六

人間日月苦無多
風雨毅中渡絳河
不合此身天上住
錯教仙子恨麻婆

其七

寶馬如風油壁青
堂中舒卷百香屏
銀河耿耿空長夜
已有人看婺女星

其八

偶因寤寐托清風
橫撫雲璈碧落中
莫慮多言小女子
還將琴瑟調青童

其九

巨鰲中斷兩山分
渡海隨身五色雲
自有仙才初不信
歸家好問玉華君

其十

翠華冰帳水晶簾
一陣雲煙起屋簷
相遇休疑天上事
隔河夫婦不猜嫌

其十一

小泛輕漚逐逝川
燭殘香炷五更前
蕭郎不顧渾閒事
又住瑤宮六百年

其十二

殘花片月暗傷神
珠翠排空別忍人
他日相逢山

脚下雲輶休問碧桃春

其十三

夢入咸陽地底春
鏡奩粉盒積黃塵
鳳凰臺上休回顧
從此吹簫別有人

其十四

五色雲階未有梯
輕身已過海東西
只緣偷食三丸藥
遂令雙鬢作小妻

其十五

臉花不綻暗埋塵
夢底滄桑幾度新
多謝破棺圓夢客
三枝瓊艷一枝春

其十六

銀宮貝闕一時成三日蓬萊頂上行不要世人知
姓字詩中悞寫許飛瓊

得甘來中州信感賦四律

重疊封書自汴州八行未盡涕交流身名一夢莊
周祠日月三年驛馬溝文筆無功權放倒酒星多
事且籠囚牡丹時節思家苦總遇仙人莫上樓仙遇

樓見開封府志

其二

南薰坊下送征塵又是昆明一劫新老大幾時猶
作客去留無主強依人煮茶石上龍團熟醒酒臺
邊土窟春若是使君知此趣風流還稱對佳賓

其三

昔年郊野逐行旌馬上風煙今古情枯木遠當人
面立白雲低向屋頭生召陵地僻初無縣博浪沙
橫舊有城零落雄圖同悵望驛亭爲我覓題名

其四

景物雖佳咏式微好將拂水浣征衣波晴南浦菱
初老風起吳江鱸正肥得雨蜻蜓離甲去辭巢燕
子背人飛相如坐右非枚叟謾戀梁園不早歸

和子逸夜坐韻

蘋末風生白葛輕小庭景物又秋聲相看酒戶隨
年減賸有詩魂入夜清荷葉翻時珠露瀉荳花香

處亂蛩鳴桐軒莫謂無多地一片寬閒江海情

秋日感興

甘將餘事付詩瓢忽感枯梧一葉飄短夢未容驚
蟻子高天原不碍鷓鴣愁從白髮簪中滿興向黃
金篋底銷猶喜故人新得意三千雲路看魁杓

庭中早桂一株較他處先開十日詩以謝
之

小橋曲曲碧闌干桂影蕭疎七月寒應是花神感
培植樹頭先借一枝看

其二

攢枝黃朶排金粟觸鼻香風放麝臍只好小山相

伴住廣寒尚要一層梯

題亡妹小像四絕

深嗟逝者無由見得見其如已隔生回首廿年兄
妹分撫君遺像哭三聲

其二

夢中了了親兄妹畫上無言似路人夢裏是真畫
裏假還尋夢裏認真身

其三

形容合眼分明在指點傳來便又非除是親人傳
得出他人像殺是依稀

其四

慈母展圖先痛哭阿兄解勸已含悲傍人盡指形容道此是尋常無病時

八月八日晝寢夢中得入手易如衝酒客賞心真比看花人之句浩吟而覺日已夕矣因用前春字韻續成長句四首書之二通一寄寶成一寄畏之爲我圓此夢也

閑移竹榻拂輕塵夢出華胥幻裏身入手易如衝酒客賞心真比看花人金銀宮闕平騰換桃柳風光倏斬新二句述夢中之景正是聳肩吟得意寒風吹散一簾春

其二

一載羸蹄紫陌塵歸家依舊水雲身祇能白眼誰容我自青雲不羨人文字窮時搜鬼怪詩腸枯處得清新牢騷應被天公惱且待人間次第春

其三

半熟黃梁半劫塵枕中何處認分身三年旗鼓思當敵一陣冬烘抹殺人落索楸枰收局敗淋浪歌曲換頭新靜思天上春多少却要分他自在春

其四

相逢便隔轉車塵料量樽前見在身詩癖應稱窮命漢酒狂妄號謫仙人室中長物青山故頭上疎風白髮新此際心情拋不得望君借我硯頭春

題汪慎爲山水冊子

山水畫神不畫骨紛紛畫匠何足數天地設景本
奇怪世人却以寸管分規矩株呈豆算雖無疵妙
趣已失十之五五日一水十日山作者毋乃用心
苦君看張旭醉後作草書以頭當筆墨當土此時
豈暇分妍媸唯覺驚蛇翥鳳字畫舞慎爲先生亦
是張顛徒身名一醉付莽鹵醉鄉別自有天地奇
景重掩在肺腑蒼蒼世界悉包舉渺渺煙霞恣吞
吐精神一片墨洒出生成泉石無刻補小松幾寸
千尺風煙樹幾叢百里雨硯頭靈鷲自飛來海面
金鰲失左股余雖不畫喜論畫今觀君畫決吾瞽

想見大醉潑墨時有如牛飲氣一鼓所恨平生未
識面得見畫古如貌古吁嗟斯人斯畫不可得收
入郭熙林泉高致譜

題席次韓閱耕小像

夜雨平明漲一犁綠楊如線稻如荑此中應有詩
人住草屋三間似灤西

其二

琴床茶具共朝昏魯望風流猶有存笠澤烟霞吟
咏處水田三頃恰當門

中秋大雨不得踐看月之約用昌黎秋雨
聯句韻簡星來畏之子逸以寧

置酒待明月約伴開高會明月不上來落日變
暝寒風起颯冽水雲布舒泰樹頭忽折枝屋角已
激籟飄絲如綆長落點似斗大密陣龍騰驤疾行
馬沛艾執杯望明月明月亦可奈濃霧閉其光重
陰塞其光譬如黃河泥泥重難沙汰安得仙人子
清光發天外廓然深室裏一燈坐噦噦小山思寂
寞藜桂絕菴馱伏几不得卧側耳聽滂沛清風時
一吹謹叟雜鳴籟遂覺百感生舊事重忸怩鬚髮
看頭巾形骸慚葦帶道義不登俎文章乃賈害浮
情秋空雲短信六月澮蹇命動得尤失志窘無賴
前事徵諸人後兆卜于蔡心期雲中月把酒相天

酌爾月本光明雲興遮蔚薈那能推雲車奔騰走
句磕吹破魚鱗文散作霞綺具有如人失時窮愁
積倉廩光輝隱不出燈燭難假丐何不此明月行
行馳玉軼旋如磨轉風疾若鳳飛翮透漏本性明
放出園藥蓋愚誠如蟻虱小才笑曹鄴寧同返日
戈邊住行雲旆聊以比商聲庶幾發青靄懷哉四
君子何處避埃塏雨肥越女菱風釣郎官膾年年
中秋夕此味適口最今年佳興敗三杯醉顛佈明
朝月尚圓白日收霖霈宿酒未盡傾痛飲休云太

重疊前春字韻二首 并叙

獨坐桐軒心輒作惡百憂倏集急不可除非笑非

哭亦歌亦咏成長句二章狂言謎語不知所云勿以深求實獲我志

妄想何由去六塵楞伽重究意生身蓬門開處逢
桃鬼黃土搏來是縵人蟻穴功名三戰敗醉鄉寒
暑一揆新眼前時事雲烟錄好處須看有盡春

其二

莫撫往事記前塵總是當場劇戲身短草昔看埋
地客長梯初架鑿天人一壺日月家山舊兩脚風
雲世事新好去洗開皮相眼神芝還有祖州春

代人作

生合相思死合休鴛鴦湖畔水分流相如自作長

門賦却今文君咏白頭

感事

一事經心一歎嗟此中誰與定毫差露蜂只得三
春鬧瓶雀還須兩手遮身世浮沉看竹筏交親聚
散比搏沙燈光月影尋常有何用追思亂眼花

戲寄嚴二寶成

白馬高嘶一路塵燈球醉看曲江春杏園應被花
枝笑何事輪君第二人

其二

葱葱佳氣是長安初借飛龍試錦鞍寄語杜羔休
得意有人疑望倚闌干

其三
麥紋紅紙照蘭膏
鳩鵲宮前月色高
正是耳邊環珮響
寒風蕭颯撼鈴絛

其四

碧桃山下訴相思
錦被應無夢破時
從此報衙休報早
八磚花影正遲遲

其五

夜深金掌落嚴霜
磨雪研冰寫硬黃
半辭一雙君認取
此中厚薄費思量

其六

蘭麝香風散半庭
春山橫列郭熙屏
世間亦有窮

夫婦洗眼看他牛女星

奉和翁大司寇歸田原韻

綠野樽開飲太平
詞鋒健出掃千兵
歐陽事業逢明主
羊侃功名付退耕
某水某山尋舊樂
一琴一鶴見歸情
獨嗟寂寞依劉客
從此孤踪似梗萍

其二

農桑閑課看橫由

見韓詩外傳

肆穆清風雅度休
十里畫

屏開有美一船明月入
無愁天將山水供青眼
人說尚書是黑頭
殿上履聲猶在耳
豈能常作白雲遊

其三

西山爽氣集上
十九
歌笑堯天醉舜年煙霞收拾咏陶然舊恩深負公
門李新曲容聽相府蓮德業東家能有幾文章北
斗竟無前須知安石蒼生望容易林泉高枕眠

其四

不棄童蒙稚且狂片長許上讀書堂十年厄運三
條燭百世師恩一瓣香棘地昔看憂國醉藥欄今
見種花忙深慚朽木薰葭質得倚芝蘭謝氏郎

西山爽氣集上終

西山爽氣集中

九日簡友人

夢裏南柯未轉頭東籬又替菊花愁多情破帽隨
年過有限茱萸付醉休入眼雲霞成昔恨滿城風
雨不禁秋亦知東閣無因謁且向青山一倚樓

謝陳于磐送菊

淡雲細雨乍寒天把酒看山興索然三徑有人憐
寂莫平分秋色到籬邊

其二

空庭昨夜已霜封浮拍持螯稱我慵忽感菊花枝
葉大故人情意比霜濃

秋柳和孫畏之

別離歲月暗消魂，幾樹斜陽靜閉門。偶以好風思舞態，還因清露覓啼痕。蟬號疎葉餘殘暑，鴉噪枯枝是遠村。憑仗數聲樓上笛，深將懊惱曲中論。

其二

井梧籬菊總經霜，謾把風流問柳塘。眉黛不堪逢寶鏡，舞衫至竟疊空箱。淒涼結帶猶隨李，見麗情錄寂莫

甘棠舊姓王

見南齊書

減盡小蠻豐艷態，荒園南角永豐坊。

坊

其三

春夢歌殘金縷衣，章臺重到事全非。柔條方碧霜

催老黃葉將乾，雨打稀雲薄漢宮。棲鳥定光寒柳宿，暗螢飛祗應愁殺桓司馬。此樹婆娑志願違。

其四

倚樓傍戶倩誰憐，更沒長條可罩煙。何處伴人同窈窕，有時經雨亦蕙綿。江頭消息遲三月，池上蕭疎占半年。錯認金風不擡舉，一窓明月落愁邊。

雙桃歌壽吳翼雲

海水粼粼三月暮，海面非煙復非霧。方朔三偷海上桃，至今記得蓬萊路。蓬萊路逕盤空曲，滿路桃花散朝旭。殘霞飛盡綠陰成，一枝結出雙紅玉。碧椀鮮明上綺筵，獻來金母木公前。木公金母笑不

食賜與仙人謝自然

戊寅元旦試筆二首用前春字韻

三十平頭小劫塵年光閑伴苦吟身青山宿草悲
亡妹玉樹春風哭故人

舍妹與子嘉相繼淪沒

陽羨米香供飯贖

去年拱樞所患永嘉柑厚擘霜新一杯藍尾攻愁陣醉眼依稀見好春

其二

去年紫陌混紅塵劇戲逢場雇賃身都憲宅中守
歲客尚書第裏賀年人空槐夢醒行歲舊故紙鑽
穿世界新

去年與亮功守歲華亭先生家與寶成賀年司寇先生家今三與亮功如故而寶成已作貴客矣

珍重幽

窓好風景寒梅休笑過時春

星來兄六十初度

三竿紅日春光美鳥語幽窓報燕喜梅花消息在
南枝香風吹浪清溪裏清溪老人住鷄窠欠伸方
醒忽啞尔形容自笑我猶童不覺行年到五紀五
紀之中一轉晴令我感嘆無窮已老人勿笑亦勿
嘆平聲聽我長歌侑筵几麻姑西別王方平時到蓬
萊量海水海水未乾桑樹枯海波才定紅塵起濛
鴻澤上黃眉翁學道千年一洗髓不若安閒白首
人尋常詩酒供驅使燕雀羣鳴桑柘間大鵬飛上
九萬里相懸尔我不相見安在高低分彼此何用
仙厨酒似膏何用安期棗成綺團團兄弟促長筵

草草杯盤亦芳旨爲君洗刮舊愁腸爲君磨礪殘
牙齒東風先到百草頭好向青山誦樂只

一月五日早出西郊訪友

街巷人聲靜門開更漏終好春迴日北高隱住墻
東短草三叉亂稜冰一水通眼新山色媚脚滑土
膏融小鳥猶嫌雪柔楊已受風松雒香醅醲苔字
綠瞳矐井上迎年飯籬邊蹋地菘雨餘雲母白霜
後女真紅爆竹喧兒子詩書坐乃翁春心爭栢葉
幽意看梅藜浮世誇頭角年光付耳聾安能與吾
友常在一壺中

讀甘來中州詩感賦

東京遺跡昔曾過有客新成五噫歌芳草路隅看
寶玦荒荆宮外指銅駝傷心世事相响沫轉瞬流
年共刹那當日歡娛今日淚平生趙李竟如何

人日哭子嘉

人日題詩嘆故吾又傷玉樹已凋枯落梅風裏悲
鄰笛寒竹林中哭酒鑪虛閣圖書傳嗣子錦囊詩
句付奚奴可知地下棲鸞約麥飯招魂向碧梧

八日微雨與星來兄坐來爽軒同悼子嘉
裁紅暈碧記當年里社春盤事渺然細雨如絲揮
不斷縷縻和淚落樽前

其二

西窓夜雨共孤燈重話巴山竟未能今雨何人同
寂莫還携庾信哭徐陵

春日過城西老圃

柳眼迷離鳥語新此時惆悵更何人山川摩詰詩
中畫花草羊曇醉後春天上白雲辭碧樹人間烏
帽壓黃塵傷心王謝堂前燕重覓茅簷寄此身

新春絕句六首

一抹春山供畫屏看山借得片時醒三年春夢如
山色記取金山聽塔鈴

乙亥正月望日過金山

其二

落梅風信問如何半月春光忽已過幸得美人才

半醉滿斟綠酒托微波

其三

東風着意柳條斜斗送輕寒入碧紗十里梅花香
夢杳淡雲細雨是年華

憶鄧尉看梅

其四

三更雨止滴簷冰紅燭當筵月半稜圖畫燕山好
風景寒林一帶米家燈

其五

料峭春風到小窓梅梢寒雀語雙雙推窓一陣驚
飛去亂落梅花撲玉缸

其六

取次年華又斬新好風吹散錦溪春踏燈舊侶都
無恙檢點樽前少一人謂子嘉也

謝汪東山四兄分惠蘋果

西山六月相思果冰窖收藏到此時一盒清香通
鼻觀半邊輕暈印衣脂舊年北地親嘗得今日江
南慰渴思張載詩渴者所思珍重瑤華分折贈三玄素柰未為

奇

看梅十絕句 有序

去年 家大兄移老梅百樹植于丙舍之傍今春
花發時與星來兄徘徊其下一樹一態一花一香
雖悅目無多而廣平所擬議亦庶幾備其情狀矣

鄧尉之千株萬樹苟非吾有奚足賞哉正月廿二
日書于木瀆舟次

去年移植老梅根此日春風與返魂雪色未容侵
月色荒村或可號梅村

其二

百株買得果園坊半遶疎籬半遶墻低處不防朝
露濕高枝猶碍北風涼

其三

如雪如銀一番新周遮都作屋頭春放翁莫到山
中去若到山中要化身星來欲遊鄧尉故云放翁詩何方可化身千億一樹梅花一放翁

其四

坐殘月落到清晨人與梅花氣味親一樹徘徊一百轉這回真是看花人

其五

暗香疎影入窓紗彷彿林逋處士家世上幾人如
尔我廣庭明月看梅花

其六

尋簷索笑帽歌斜詩酒顛狂未有涯常恠廣平心
似鐵却因戰藝賦梅花

宋廣平梅花賦
序戰藝再北

其七

小雀啁啾落日邊梅根梅蒂問因緣十年煙雨羅
浮夢要細思量更渺然

其八

橫列春山翠帳開幾株相映白皚皚輕煙未散月
未上放鶴亭邊雪欲來

其九

樹頭雲浪起微波花惱因君一曲歌爲報江南好
春色官梅詩興近如何

其十

莫作當年汗漫遊樹頭消息半東流青帘綠酒銅
坑路花與愁人盡白頭

用前韵題路傍梅十絕寄吳西齋先生
序

流水斷橋竹籬荒逕一枝特出千朵嫣然不遇袁
豐空抱冰姿玉骨終逢功甫相期紙帳銅瓶嗟嗟
零露如珠花應有恨倚風欲笑予豈無情尤物動
人傷心成咏參橫月落唯覺春寒黯淡衣香始知
歸去斷章十首未免唐突西施書草一通所望和
歌東閣

暗將春信到孤根香骨招回竹外魂舊夢斷橋何
處憶梅花村是莫愁村

其二

端端曾任善和坊雪嶺西頭白粉牆今日相逢何
太瘦閒憑翠羽話淒涼

其三

殘雪初消梅藥新澹粧簷戴髮邊春鏡中仔細看
花面花與佳人合一身

其四

舊事分明似隔晨隴頭人見自相親一枝留得春
多少也要臨風送遠人

其五

香雨清風透碧紗此中應是四娘家橫斜疎影全
身在何事人來不看花

其六

偶然竹外一枝斜引起遊蜂鬧未涯獨有西陵松

栢下更無人去問梅花

其七

雜還荒蕪衆草邊王孫見幻也因緣羅帷四卷春
風裏笛孔閑調思惘然

其八

寒勒凡花不放開獨憐墻角雪皚皚此身願化孤
山鶴淡月疎烟作伴來

其九

一點檀心付碧波金樽緩勸雪兒歌相逢莫要輕
拋擲人世紛紛桃李何

其十

十載傷心十度遊偶因寐莫見風流粧梅詩句猶
能記花送佳人易白頭

西齋粧梅詩十年花
送老一樹記曾遊

舟行見疎梅數樹暎罩溪邊用前韻重題
十絕

空山不見斲雲根何處幽香醒夢魂茅屋數間桑
樹秃梅花抱水自成村

其二

野岸蕭條直半坊種松爲戶竹爲牆曉風吹得波
紋起只覺梅梢一陣涼

其三

可憐溪水亦迎新歲歲花開水底春水月觀音觀

自在須知一水一分身

其四

月落星橫天未晨此時清淺本相親倚欄剛向梅花笑水底看花已有人

其五

迷湯似隔一重紗水窟樓臺別有家身向梅根須勘破眼花落水是空花

其六

描來照樣逐行斜一段閑情問水涯水底青天天外樹假如天上看梅花

其七

不放香風到那邊誰將形影結因緣人間何處無優孟鶴骨水肌學宛然

其八

一樹旋教兩處開岸邊水底亂皚皚狂風搓亂瓊瑤影此日真身現出來

其九

水中香氣樹頭波如此風光儘可歌莫遣真花真到水兩邊脫空柰君何

見華嚴經

其十

此行疑是月中遊人共梅花卧碧流痴把心情付溪水香風試與喚回頭

殘梅十絕四用前韻

寂寂香歸石上根春風已逐海棠魂
樹頭幾點疎星在雨片風絲問故村

其二

檀板金樽碎錦坊王鞭何處認高墻
青天朗月分明事香雪驚心撲面涼

其三

桃蹊李徑逐時新檢點梅梢賣賸春
好似教坊人老大等閑調笑退休身

其四

花信風中二月晨情懷唯與酒爲親
愛吟只算初

開句玉樹埋塵哭故人

在之殘梅詩只笑初開第一枝

其五

香冷風疎一幕紗魂歸何處又成家
叮嚀小雀休偷啄試看金鈴護落花

其六

蝶翅飄零燕尾斜

宋伯仁梅譜有蝶翅燕尾

此時幽趣更無涯花光

筆底曾描出十丈空枝數朶花

其七

半落籬邊半水邊南枝春夢作前緣
闌干留取殘花朵却笑癡情孟浩然

其八

春風勒教一齊開樹底流光鬪雪皚猶有數枝開
不盡閒隨蜂蝶放香來

其九

片片光飛羅襪波殘梅詩是落梅歌勝幙留得殘
枝未金鼎貪看結子何

其十

銅坑銅井逐年遊每到花殘欲淚流零亂樹梢如
白髮一回落盡老人頭

蓬窓坐雨與星來兄作看梅倡和詩各得
四十首彙爲一冊重題四絕書于冊末

一葦滄江伴雨絲開梅咏到落梅時亦知疎影橫

斜後難得梅花有好詩

其二

咏梅詩句訟紛紜惱亂花魂付火焚梅格梅標看
仔細莫教香夢入梨雲

其三

白馬青帘一路春看花難遇咏花人憑君壓倒林
和靜淡月疎烟爲寫真

其四

收拾餘香付綠苔梅花只笑不曾開歸囊携得看
梅句應有香魂月底來

靈岩道中遇雨

山色雲容兩冥濛扁舟歸去別花叢打篷初放社
翁雨拂面先來少女風似線添將新柳綠如酥潤
入小梅紅酒樓人散笙歌歇一歲看花事又空

阻風用前韻

白霧漫天煙雨濛蓬窓閒閉敗蘆叢可堪題柳看
花客正遇吹花擘柳風好夢庶尋江上月村醪難
作臉邊紅小庭梅蘂分明約莫要歸家一樹空

和甘來兄雜咏八首

幽琴

覆我掌中酒理我膝上琴幾陣風雨去一庭花木
深泠泠明月色湛湛空潭心子期如未死識是清

商音

晚桃

桃坼葉已綠山中花始開春風有先後地力無增
培小鳥時剥啄遊蜂亦遲徊托根一失所過時良
可哀

疲馬

鞭策不以道飢餓空勞形崎嶇太行路黯淡王良
星垂頭卧槽櫪驤首思郊垆門前和鸞過長號卓
耳聽

春鏡

青銅白晝光照此洞房冥美人午醉濃流鶯催夢

醒起來倦更坐坐與鏡臺並譬如石城西着箇莫
愁艇

古劍

燁燁霄漢氣張華嘆不作破匣裏冰腸乾土埋霜
鏗水光白披紛血痕紅錯落神物化有時蛟龍假
寄託

白鷺

白鷺貌何閒拳足離披立水肥茭葉香露重蘆花
濕偶飛孤渚煙時傍枯荷笠何處有遊魚漁舟衝
浪急

廢井

獨立廢井傍下視十丈黑應有蛟龍蟠腥風吹暝
色石欄沒荒草銀床委叢棘爲問王者誰神傷意
愴惻

寒缸

紙窓風颯颯星火明復滅坐看燈花消愁比蘭膏
結衾寒旅客況帳冷金閨切一夜夢無成音書千
里絕

寄京口張壯輿

海門潮落天地寬潤州佳氣青湯湯相逢執手即
知己一言投分披心肝憶昔甲戌之歲月在子逢
君開譙高堂裏金波滿酌十分樽六朝山影輕如

紙同蹄白紵舞春風笙篁合奏歌齊童留髡醉客
投孟軻藏闔射覆張僂弓紅娘拋打左調轉觥使
專權右職顯當筵紅燭一千枝月白霜清雲四卷
阮家諸姪多才華駢羅瓊樹含竒花謂靈度仲子直夫
年二十醉歌拍手歌烏紗頽然倒卧芙蓉褥月掛
長廊竹逕曲喔喔鷄鳴酒半醒紙窓日色紅于燭
是夜宿靈度別業水上浮萍天上雲池魚失伴猿失羣甘露
寺前秋雨暗戴公山下夕陽曛麻衣羞作渡江客
郎當鈴語驚魂魄一飯常懷粥鼓聲五年不到楊
雄宅傳聞公子在大梁文星炳耀中天光鄒枚司
馬盡賓從琅玕白雪成篇章嵩高山上雲如髻每

念張家好兄弟有客歸來爲我言高堂不忘平生
契感君重話高堂遊孤燈獨坐黃昏愁年來身世
不可說縷縻雨涕縱橫流蹇驢荒草金臺下壓面
黃塵逐裘馬戰敗歸來靜閉門飢骨羸軀無一把
可憐靈運當世才名場未得猶草萊似我麤疎不
足數君亦不遇誰爲哉春光年例暗入手紅綻桃
花綠變柳拂水岩前瀑布飛與君有約能來否

贈張訥夫

君詩一字一清新白雪曾襟玉樣人楊柳暗籠孤
渚月芙蓉偷放小洲春賈生經濟應前席楊炯文
章托後塵慚愧十年何所得風光愁煞苦吟身

張節母七十壽

手持碧藕股碗捧丹砂汁再拜壽節母起爲張君
揖張君兄弟行乃翁吾父執所以節母事本末頗
收拾節母不識字大義若誦習節母不爲名清風
正嶭岌所天厭世時節母年方廿張君在襁褓據
地呱呱泣舅姑已白首孤兒未成立三代寸脉衍
百指一身給衣裳借月縫麻苧偷光緝痛來草木
枯淚溢星斗濕張君少好學日月懷靡及節母命
從師擔囊亦負笈無何舅姑沒節母悲於邑念茲
五世棺安得淺土入經營一歲間馬鬣高岌岌松
栢鬱成行墻垣儼修葺張君妙文章聲譽重匱襲
節母有令子益茂彼名級撫軍睢陽公政治民和
輯搜羅獨行傳文書行下邑吏胥捧成案屋角祥
烏集高坊百尺起賀者沸滄渠人謂節母賢母心
正憂悒人願節母壽母今方七十間氣在天地千
年一噓吸神仙事縹緲河漢光歛翁金樽上綠酒
銀匙進玉粒願母多子孫螽斯歌蟄蟄

柳絮詞八首

百花都向風前落唯有楊花最愛風
似絮隨郎飄泊在西東

其二

亂入高墻拂繡床
休嫌柳絮太顛狂
順風吹起風

西山真集卷中
十一
吹落自是東風少主張

其三

江南春夢是耶非
飛絮輕輕點客衣
郎道絮輕儂道重
身輕何不向高飛

其四

灞岸隋堤無數樹
恨郎獨愛白門春
郎今自作衝風客
柳絮何曾送遠人

其五

生離一樹柳青青
更逞狂風落半庭
願作柳堤堤下水
郎心生蒂作浮萍

其六

春色燒殘一寸灰
畫船何處載春回
郎心似絮渾無定
羅綺風前蕩樣來

其七

成球作片逐風斜
柳岸何人問歲華
自恨生來輕薄相
故將零落當開花

其八

一般飄落兩悲傷
絮似儂來亦似郎
柳絮似儂儂薄命
似郎郎要細思量

新柳用前畏之秋柳韻

春心何處絆愁魂
雙槳閒過蘇小門
碧玉試看羅帶影
黃金初碎剪刀痕
江南舊夢衡臯渚
塞北春

風榆柳村白浪粘天塵拍面紅闌干外細重論

其二

低拂枝梢避曉霜舊經行處似橫塘隋堤淚眼依
孤艇灞岸愁眉送兩箱捲葉未容悲戍客封頭猶
可事空王

清異錄新栽楊柳必用
泥封其頭頗類比丘頂

義山詩句應難得一樹

春風屬教坊

用柳枝
乞詩事

其三

舞衫初換薄羅衣走馬長街認是非防妒小腰猶
約束偷粧淺黛強依稀偶窺碧水爭春色閑伴梅
花任雪飛慚愧津亭人醉後一枝入手事相違

其四

媚眼星星劇可憐高樓漠漠禁寒烟一條春路歸
吳苑萬縷幽情挂楚綿悵望幾人同此日風流正
是記當年東君不肯留年少吹綻鴛黃明月邊

東山齋素蘭

青天白日一簾風書案吹香玉兩叢綠葉素枝標
格好與君相遇楚辭中

其二

整冠約佩對靈均淺粉輕烟爲寫真願借幽蘭托
知己世間難得素心人

再和秋柳韻

一葉隨風黯斷魂絲絲無賴倚橫門月稜濶作做

分梢樣綿字粗存蠹篆痕短纜偶停沽酒店漁簑
閒挂夕陽村吳江灞岍歸家路重對秋娘與細論

其二

板橋殘夢一天霜萬縷寒烟罩野塘塞上有人吹
白草陌頭催信寄紅箱已無顏色逢韓翃猶賸腰
肢對楚王勘破枯條黃葉意任他風雨在禪坊

其三

落葉蕭蕭冷客衣每因景物感情非白家園裏春
風去蘇小門前燕子稀詩筆酒巾留恨在離樽別
曲夢魂飛縱饒百尺亭亭蓋三度秋風志已違

其四

曉風殘月劇堪憐腸斷閭門十里烟細雨有情同
滴瀝浮萍多事尚纏綿玉樓人去遲歸日金縷歌
終泣暮年從此秋光倍惆悵更無心到斷橋邊

西山爽氣集中終

西山爽氣集下

得寶成歲暮詩依韻奉荅

思君西向望長安雙闕瀾湯翠霧攢書信八行融
蠟淚新詩四首走彈丸仙人掌迥吟肩冷玉女牕
高紙帳寒從古文人例凍餓杜陵休要怨儒冠

其二

讀君詩句轉疑猜世「何人解愛才仲蔚窮居蓬
繞宅平原粥食甑生埃空隨銀燭朝天去少有金
魚換酒來月料俸錢能得幾須留避債築高臺

其三

三千別路一年違從此雲泥出處非君向春風仁

壽鏡我歸蒲水釣魚磯落花飛雨粘青笠新草垂
楊映綠衣相較此中誰得失謾因籠絡泣金鞵

其四

望望蓬瀛隔兩塵浮槎何處問通津楚江秋菊供
朝夕同谷長鏡話苦辛舊業煙村雲是伴孤燈雪
屋影相親却憐得意看花客同作飢寒感慨人

題馬子白遺照

瘦頰峻嶒骨似冰坐禪居士在家僧花光月影空
中手悟到虛無第幾層

其二

酒場博局隔前塵重對蒼顏白髮人春色三分半

流水揚州鶴背看分身

何處生春早二十首

何處生春早春生古木中亂鴉栖日落羣蟻入心
空苔綠初經雨枝柔旋亞風樹皮殘剝處短葉一
叢叢

其二

何處生春早春生枯草中門前三日雨陌上五更
風淺色爭羅帶流光入綺櫳夕陽盤馬地驕殺玉
花驄

其三

何處生春早春生亂棘中日光紅透漏花氣暗微

濛廢苑行人過荒坟有徑通驚鳴羣小雀飛入窠
深叢

其四

何處生春早春生乾葉中聚猶堆積雪散是逐旋
風山店青帘吟匡床夜夢空樹頭餘幾葉留伴落
花紅

其五

何處生春早春生荒澗中曲當山石亂斷或暗泉
通曉雨雙峰翠斜陽一道紅更無遊屐過新草自
成叢

其六

何處生春早春生廢井中冰消銀索淚波皺石闌
風浮碧天平貼凝光鏡半融景陽人寂寞一樹露
桃紅

其七

何處生春早春生草閣中柳含千縷雨梅散四窓
風排戶青山入當筵綠水融夜深吟未穩愁對蠟
花紅

其八

何處生春早春生茅屋中酒藏十月白
見范成大吳中記花借
四隣紅綠野牛耕雨疎籬犬吠風北窓階下竹短
筍已抽叢

其九

何處生春早春生蘆箔中晝長白日碎夜話一燈
紅靜掛催花雨閑開接客風旋看桑葉綠畱取放
蠶叢

其十

何處生春早春生紙帳中半鈞新月魄一室落梅
風酒思愁看盡心情懶欲融此宵魂夢穩試問蕙
蘭叢

其十一

何處生春早春生敗絮中背猶憐負日襟尚怯當
風旋覺肌膚活俄知血脉通三盃卯時酒添得臉

邊紅

其十二

何處生春早春生破帽中髮驚看種種眼暗欲濛
濛拂拭塵埃積爬搔汗氣融明朝試梳洗最怕癢
頭風

其十三

何處生春早春生草履中步當新草綠踏處落花
紅好月隨身轉青山有路通春光問深淺兩脚任
西東

其十四

何處生春早春生箬笠中滴殘楊柳雨斜帶杏花

風一棹菰蒲浪五湖煙樹東此時無限趣都屬釣
魚翁

其十五

何處生春早春生禿筆中輕盈飛燕子整頓學歸
鴻吟咏煩歡伯鈎描托楮公墨花輕落處一陣打
斜風

其十六

何處生春早春生斲硯中氣蒸金斗溫暖化墨漿
融筆飽含朝露香濃散麝風端溪石上眼猶似望
烟叢

其十七

何處生春早春生燈炮中夢醒錦被薄客散畫堂
空油暈寒紗碧花偷小豈紅眼看明復滅知是五
更風

其十八

何處生春早春生香燼中篆烟翻鼎白金盒燒去聲
球紅錦帳微波暖羅衣花氣融薰爐猶未冷晴霧
半屏風

其十九

何處生春早春生淺水中土膏蒸地溢雨氣帶泥
融有意隨明月無波恨曉風闌干花綽約倒浸幾
枝紅

其二十

何處生春早春生暗鏡中碧紗人彷彿簾幙雨冥
濛粉恐調過白脂愁點誤紅一年因曉霧遺恨百
花叢

有客自武林歸誇我以西冷梅花之盛追
念舊遊用前看梅韻賦斷句十首簡星來
子逸且傷子嘉也

十年風雨滯吳根
畫湖山遶夢魂
此日茶烟輕颺裏
落梅重話舊西村

其二

洞簫聲杳憶花坊用吾子行事
南北青峰似削墻
一盞梨

花澆墓酒江山如故倍淒涼

其三

西冷花柳逐年新
樹上黃鸝解好春
忽感嚶鳴求友句
鴛湖恨水是前身

其四

連床風雨記佳晨
席上劉盧盡世親
夢斷鷄鳴尋舊約
可憐屈指只三人

其五

酒鑪長袖掩團紗
東浦橋頭第幾家
剛見紅梅開落處
一枝偷放小桃花

其六

新草長堤裙帶斜西冷烟樹老生涯梅魂已逐東
風去獨對冬青幾樹花

其七

湖光山色到愁邊半月稽留結淨緣
急風闌水東去冷泉亭畔一潸然

樂史寰宇記靈隱本名稽留山

其八

伍相祠前幾樹開孤山園裡亦皚皚酒徒零散親
知少頭白蕭郎忍再來

其九

斷橋雙槳渡微波曾唱蘇家楊柳歌柳線太長情
太短短長其奈逝波何

其十

水跡雲踪記舊遊湖船縹緲水東流今朝重話西
冷夢收拾閑愁載兩頭

花朝畏之玉輪青門扶義過我小飲青桐
軒青門即席成長句六首以花朝過青桐
軒為韻依次奉和

三逕春和竹影斜高軒相過野人家看盃先借治
髡酒明日春社繞屋爭開壓帽花粉本桃枝紅似血擘窠

墨氣黑如鴉扶義寫莖花玉輪書大字顛狂且要裝風景如此佳晨

沒處賒

其二

春盤草草好相招斗室歡呼慰寂寥暈碧裁紅同

往事歐陽公春盤賦以暈碧裁紅為韻聽鶯撲蝶永今朝抱堤草色拖裙

綠入檻山光着黛嬌檢點禿毫和斷硯吟魂先到

樹頭瓢

其三

摒擋閑愁付短歌酒闌吟韻雜婆和春風芳草詞

人盡白屋青山處士多長慶篇章頻往復謂青鹿門

踪跡屢經過謂東山斷金新結同心友藕孔乾坤且任

他

其四

花信風中花滿庭勝幡梢上繫金鈴疎簾紅日春

心醉紙閣幽蘭午夢醒柳色看來三處綠扶義畏之及余池上

各有楊柳一樹山光分得四家青畏之青門扶義與余四家俱住山麓獨憐鬧市無黃

鳥酒枕茶鐺拉汝聽東山獨居城東

其五

拈韻分題昔夢空丙子花朝與子嘉分題唱和料量宿酒奠東風梅

花影瘦攢宮月桃蕊魂歸露井桐舊雨依稀簾幙

畔好風飄颺鬣絲中文親半作晨星没晴絮湯天

淚溟濛此首專悼子嘉

其六

坐看流光上素軒酒扶健筆欲騰騫醉鄉未到埋

千日花氣先驚霧半村芍藥闌邊三月夢海棠枝

上一年魂春遊重訂西山約拂水岩頭具綠尊
盆蘭詩為夏琛石作

身與幽蘭共歲華春風吹散四窓紗不因挑蠹澆
泉苦難見雙盆百朶花

其二

磁盆還是宋冬青光澤鮮明欸識精如此安排真
得所強如折下挿金瓶

其三

曄曄俄生几案光夜摩天上看花藏從今蘭是男
兒草莫信淮南道不芳

淮南子男子種蘭美而不芳注云蘭陰類女子草也

其四

紫石槽盆三尺長疊山停水似都梁水邊倒挂花

頭重應是全州鈴子香

盆中疊小石石下置水花朵皆倒垂

其五

葉葉春風護玉環

養蘭訣惜葉猶如惜玉環

羅幃拖地鐵鈎彎浴香

沐澤看終日彷彿宜興大小山

宜興有大蘭山小蘭山

其六

紫莖綠葉託深林培養三年結斷金別有捧心蘭

一種護花先得主人心

盆中捧心蘭花瓣特異

其七

陳良魚鮓看分明白瓣偷紅染暈輕比作藏蘭吳
孺子香風小室適幽情

其八

年年風雨保孫枝受用花香只一時供養黃磁安
綺石痴情真足並王維

其九

品格從君次第分護持位置盡紛紜閩中舊有蘭
花譜吳下今推張應文

應文吳人也善種蘭有續蘭譜婁東王鳳洲先生為敘

其十

案頭一卷種蘭經十載蘭花作影形正似養成佳
子弟春風羨煞謝家庭

勸酒歌贈張庭仙時庭仙從山左歸

南箕北斗巧相左負軛虛名終悞我春風本欲催

花開却令花飛無一朶不用更聽北郭鶯不須去
棹西山柁擎觴捧盃遇酒即飲之玉鐺金斗直么
麼五年泡影花散空從他馬耳吹東風河干楊柳
一分手君往鄒魯余秦中玉女峰高巨掌聳十千
美酒沽新豐樂遊原畔住一月驪駒催賦歸江東
筆床硯匣弃來久押韻排聲苦束手平時不暇論
妍媸拋擲何如異便溲傷心蝶夢燭三條飽飲當
場墨一斗呵神罵鬼箋天公天公命我常飲酒是
時同飲潘與孫

潘二子嘉孫五子逸

盤筵草草開坏尊沾唇薄吮

初得味喉隴次第回冬温琰琬之膏碧玉髓玻璃
滿泛春江渾箸甕已眠畢吏部高談猶醒淳于髡

每逢花月話吾子安得雜還條來此對壘重開舊
酒兵差君中界作做觥使此語經今已四年星星
頭髮悲馬齒前年戰藝又無成泣月長安舊行止
可憐世事幾更遷出門西笑空茫然潘子騎鯨捉
月去孫郎意興非從前故交猶有曾與邵曾大漢瞻邵二甘來
戶小不放春風顛東山大醉僅一盞從茲酒譜無
人箋人生留得空尊在眼底鶯花會有待昨日聞
君山左歸愁眉顰額生光彩胡麻炊飯菜煮羹梨
片桃枝爲君採滿酌金屈卮聽唱玲瓏詞燭夜花
中甘露瀉浮君大白君莫辭參星才上酒旗出酒
泉未竭糟丘移諸天飲樹尚且流米汁君今不飲

將奚爲

社日寄寶成

二月江南暖乍回陌頭燒紙鼓如雷好風送得田
神去新雨迎將社母來兩岸蠶香桑樹綠一畦春
醉菜花開京華今日題詩處應傍齋宮飲福盃

其二

澹蕩春陰古櫟中看人醉醒各西東已將舊稅完
租吏更沒私田托社公曲檻暗添新草漲疎簾晴
放小桃風三廳學士休煩惱猶喜詩人耳未聾

晚過幽坡

紅雨生肌花映肉燕子成羣入華屋斜陽人散社

鼓停夾路梨雲歎白玉山光點綴額邊黃草際依
稀雙鬢綠清歌倩得董雙成共撫長離憂圓腹花
髻欹斜舞袖長內家新樣全裝束音稀樂闋思惘
然牆角蕭蕭數竿竹

鶴夢四首和孫畏之

白石清泉作檻籠精魂時復駕虛空梅花影裏孤
山月芝草香前碧海風苔雨幾時空蕙帳簷鈴何
處閉珠宮三山舊有棲真地此日依稀六翮中

其二

九萬風高冰雪姿偶將打睡乞歸期青田有網休
貪啄王樹無塵莫檢枝一片雲閒花落處幾聲風

到露寒時驚心玄圃山頭路猶似仇家舊水池

其三

孤踪直上沈寥天世界團團一聚煙黃子陂頭何
綽約臨皋路下亦翩躚相看雲漢吾往矣乍怯罡
風正惘然倘過羅浮香雪裏莫將謎語話堯年

其四

劇憐魂夢愧殘形也復飛騰渡杳冥儔侶相驚塵
物混羽毛猶帶故巢腥飢甯豈足供仙馭短翮難
教入相經一自稻梁恩重後更無心緒對山靈

夏琛石以盆蘭見贈謝之以詩

十束生芻韻未工一盆珍重自甌東慚非李賀囊

中物却換羅含宅裡叢處士階前分玉佩隸人肩
上散香風明窓從此添幽趣雅意相亡臭味中

用東坡韻記庭中花木四首

和海棠

庭荒地僻無嘉木海棠一樹抱幽獨花枝半落主
人來應今名花笑人俗碧雞坊裏錦作堆燕王宮
下艷成谷花胡不向此中開却弄春光覆茅屋慚
無高燭照紅粧幸有頽垣遮粉肉殘枝留得烟霧
微嬌態可憐風雨足花前偶坐轉淒涼月下重來
更清淑主人從此看殷勤還餐落葉撐空腹譬如
北人不識笋長鐺大釜煮枯竹翻恨開時不來看

如今落去空瞪目憶得前年海棠院猩紅十樹如
西蜀今年又見江南春雪中爪印看鴻鵠此花棄
置賞者誰聽我花開花謝曲倒頭醉卧海棠根根
外靈犀同背觸

和桃花

武陵旣飄渺東園亦榛莽唯有洞庭花從之嗟道
阻小園百餘樹依稀似激浦管領三分春一分判
風雨餘將二分愁囑付司花女此女不惜花委棄
如塵土煩惱問落花花空無一語枝頭綠葉動粗
比一指舉不見海上風飄蕩泰山櫓而此柔弱資
保護誰爲主花落返故根坐令觀者苦空憐花開

日相對吟謾與還把落花意燦爛看縛組魂兮何處歸飛飛同鳥翥

和多葉杏

春心無處發吐出竒異葩曲江千萬樹無此一種花欲開真嫵媚艷極翻高華散香時可拾弄影或半斜前歲碧山堂一樹高簷牙主人悲宿草過客傷清笳十年太和春一旦蕪城沙遂今午橋庄不及種杏家茅屋幸無恙相勸休咨嗟春甕有餘酒飛盞澆紅霞還携月下琴對花憶瓠巴

和瑞香花

廬山一夢覺名花出孤岑休嫌顏色淡香氣入骨

深旋旋劍繞指森森王作林彷彿蒼筤香吹散天女襟破露動微笑迎風吐蘭音不同蕙草質還結丁香心三春養花天一日半晴陰色香及時採莫待淫雨霖愁來花前坐閒咏東坡吟深感陳跡意為倩丹青臨

贈邵甘來表兄

垂髮齊年記撫塵巍然相看丈夫身回思梨栗蘇程契

東坡送程六詩我時與子皆兒童狂走從人覓梨栗

雖隔山川稽呂親今雨劇憐

人慰我殘燈猶似醉留賓十年踪跡同寥落重話西窓拭涕頻

其二

感嘆年來離別頻空心潭影是前塵已與甘來
讀書破山寺詩書
摘入青油素富貴驅將黃土人謾把風雲爭健筆
未容溝壑置閑身乘車戴笠今朝約珍重西州一
脉親

雨中書悶簡東山

雨裝風景近清明兀坐同于中酒情唱和何人來
北郭登臨無分到西城一爐浮炭煨殘火兩樹松
風作水聲聞說山庄多勝事花香茶熟管絃清

雨晴戲招東山

佳晨正值乍晴天行樂須當及少年欲去春寒猶
料峭初開山色更新鮮昭明臺北桃含霧言子阡

頭柳放煙如此風光憑酒賞破慳多帶杖頭錢

與甘來兄追敘昔遊得七百字

江南三月暮春水滿沮洳落花逐水流惱亂春心
緒古歌歌綠水今歌翻白紵急管和催絃舊遊難
覩縷金臺初識面越嶠相結侶交情從此親歲月
粗可譜先人好園亭大樹名其所榆柳歷空階

鶯花覆孤嶼蓆帽檻前青越秀尊中俯蓆帽越秀二
山皆在城內曹

溪分半漲靈山失左股依稀平泉莊彷彿芝田圃
臺閣列縱橫花木互儔伍綠鳳栖倒枝白鷗下遵
渚榕陰入窓櫺蕉涼沁肺腑桂矮四時香梅老全
身儂肉豐莖蔻胎錦暖薔薇午洗盞春澆花清談

夏避暑月上坐南軒風寒瑾比戶水珠未能名果
類不可數厭飫僅百一遺忘記十五君泛雪溪舟
直理珠江櫓登門謁舅氏肅衣拜吾 父子出讀
書堂君來游凱廡相揖語溫溫相看笑响响是時
九月中秋光滿浦澈天高淨如拭嵐翠濕可取君
為西州客予忝東道主榴糕九日樽蠻酒千箱稌
紅灰咽檳榔蜜米熬炬糝柑子食厭甜椰漿味亦
精顛狂醉後歌潦倒燈前舞投心結死生忘形到
尔汝行行復東歸送送別南浦淒涼江水頭寂莫
浮丘塢書信雙魚稀道里五千阻明月驚照梁松
風思握麈自後逢西江船頭片時語慰問新起居

閑說昔遊處匆匆執手期各各分飛羽愁聽喚風
歌無奈下灘鼓誰知二年中昊天奪吾祜清霜號
風木血淚洒新黍人事變飛灰家園無賸土湘蘭
炊作薪玉田遍生穠辱兄憫梗頑謂予不莽鹵文
章感盛衰書史道今古共期十年功同挽百石弩
却憐金臺荒還信周原膺空卷五百兵赤手十萬
賭駢駢排天風爛爍燒林炬通苓收藥籠琴雀遭
焚煮青檀哭鄭虔紅杏嘲杜甫出去失東隅歸來
守桑土杜讀風雨壞琴書塵埃積鐘虛家雞聊共談
生犬或余侮舊交數君子宴遊時我與角巾雨裏
歌竹杖山前拄菜摘野人畦飯供山僧芋對酒室

有花臨池案有楮人笑狂生狂予嘆腐儒腐兄才
自一世家聲易幹蠱文苑次第周書林甲乙部英
氣挂眉睫大字撐腸肚涉川具舟楫架屋足柱礎
愧予髮漸短憐我手空撫卑飛引鷓鴣雜學棄魴
鱖志同小草叢願比飲河鼠期君揚日戈望君揮
玉斧莫作樗木癭莫學卧瓜窳養成深霧文收入
上林簿

寒食集有美堂分得食字

濕雲猶潑山頭墨挿柳門前記寒食擔頭糕染麥
葉香甌中粥煮莢花色春光時被節序催美景苦
爲輕寒勒相歌過厭往來頻相去巷南與巷北

青桐軒即事

幽蘭遶室開香界桃蕊窺簷破信風驚恐乾坤餘
藕孔寬閑身世比鶩籠西州花草斜陽裏水部雲
煙疊石中好作日長無事飲醉鄉還去覓無功

送甘來兄次東山韻

梅子含酸柳葉顰可堪江上送行人布帆一片輕
如紙捲盡虞山十里春

其二

珍重寒爐撥芋時十年功業指前期如今老我塵
埃裏齋鼓空題半首詩

其三

河干執手送君來，須記臨行酒一盃。
逋債今年無處避，南宮爲我訪移臺。

洛陽南宮移臺
即逋債臺也

其四

鎮日陰晴無定時，輕寒料峭凍雲垂。
予情不及寒風厚，留得春光半月遲。

題馬扶義紅梅畫幅

北地胭脂供換骨，孤山疎影試輕粧。
春風吹透生綃背，捲起中堂絳雪涼。

其二

華光蒼老枝條裏，舜舉風流顏色中。
不管滿城桃杏妬，亂將紅雨灑屏風。

落花六絕

桃根桃葉盡成空，勘破情關付曉風。
偶到園林還悵望，閑愁無處避殘紅。

其二

狂風橫雨送殘春，萬片香飄漠漠塵。
試看海棠依舊否，不堪重問捲簾人。

其三

幾陣香風遶畫船，悠揚如訴恨綿綿。
綠波碧草渾閑事，南浦相思又一年。

其四

蜂狂雀啁一枝殘，舊恨依稀記曲闌。
那比丁香根

帝固同心相守樹頭乾

其五

瞥見情懷似夢中
胭脂留得半邊紅
嫣然一笑成何事
宋玉牆頭十里風

其六

未敢分明怨物華
暗揮雨涕亂如麻
花開常被垂簾隔
待捲簾時是落花

小庭牡丹和邵青門韻

百朵紅深綠葉中
一闌煙霧護花叢
東君若解相擡舉
只放陰天莫放風

其二

十日夜前作酒狂
醉來移榻卧花旁
三更酒醒夢初覺
始信人間第一香

其三

彩雲籠處風光膩
酒暈輕時睡思融
嬌煞更無人會得
和身倚入小窓中

其四

檀板金樽消好日
短歌長詠遶香叢
欄邊尚有平頭紫
簾外先開照殿紅

其五

筆花疑共牡丹生
七首新詩四座傾
裁碎秀才家裡錦
千堆交付與驢卿

其六

掠掠蜂衙初作隊徐徐蝶夢不曾醒
庭中幾樹閑花草供奉花王南面聽

西山爽氣集下 終

